

欽
定
全
唐
文

欽定全唐文卷一百八十四目錄

王勃八

梓州郪縣兜率寺浮圖碑

廣州寶莊嚴寺舍利塔碑

梓州慧義寺碑銘

并序

梓州飛鳥縣白鶴寺碑

欽定全唐文卷一百八十四

王勃八

梓州鄭縣兜率寺浮圖碑

若夫仙樓白玉窈冥崑閬之墟神闕黃金寂寞蓬瀛之浦
斯則罔巒髣髴稽鳳冊而空存島嶼憑陵艤龍舟而罕迫
至若按皇軒於夏錄考璿構於殷圖周王北洛之宮秦帝
南山之閣西京故事下聽雷霆東國餘基俛臨風雨莫不
陵遷谷變共榛灌而邱墟火絕烟沈與風雲而垓莽其有
據坤靈之寶位借神道之冥扶占象緯而圖基揆川原而

宅址蜂臺映月還臨舍衛之城雁塔尋雲卽對耆闍之嶺
成而不毀者將斯之謂歟兜率寺者隋開皇中之所建也
爾其林泉糾合之勢山川表裏之制抽紫巖而四絕疊丹
峯而萬變連溪拒壑所以控引太虛蒸雲駕雨所以盪洩
元氣浥江千仞波潮將旭日爭光都城百雉甍棟與晴霞
共色信造化之奇模盡登臨之妙境元房霧轉抗金樞於
桂岳之前紺殿星開栖玉刹於梅林之下巖花落沼近拂
天衣潤葉低陰斜籠寶座宵汀鶴警乘鼓吹而齊鳴曉峽
猿清挾霜鐘而赴節若乃巡碧磴歷元階瑣窗澄彩瓊鋪

洞照神姿滿月疑臨石鏡之峯眾馥揚烟似對香爐之岳
信可下清人境上配天都爲勝地之先鳴執名山之右契
者也爰有信弟子某乙等夙祛塵網早植慈根悲梵室之
未宏悼禪居之猶褊以爲上棟下宇河圖避風雨之災廣
榭崇臺時令著高明之宅是以菩提長者競潔舍衛之壇
天帝人皇爭闢仙宮之塔則知威容下麗羣生解瞻仰之
因材樸重琬黎人有子來之地乃於寺內建浮圖一所某
年月日鄉望等兆基宏願繼發淨因陵轍中天規模大壯
高列砌架迴浮輕軒直上千尋周迴百步占氛候景神祇

叶幽贊之功揆墨端行班倕逞絕羣之思收岱宗之杞梓
聚崑山之玉石土兼五色金逾百鍊龍蟠萬棋策屏翳而
高驤鶴矯千楣冠扶搖而獨運重簷靄靄雲將反覆於櫺
軒洞宇寥寥風伯栖遑於戶牖仙娥去月旅方鏡而忘歸
寶婺辭星攀圓璫而未返元費湛霽若鵬飛之戾九天丹
楹聯騫如鳳翔之據九仞每至韶光照野爽靄晴遙列郊
墟於四野開雲氣於千里風恬雨霽烟霧藻天地之容野
曠川明風景挾江山之助則有瑀簾繡軸排淨域而停輪
寶騎銀鞍指珍臺而聳轡於是披岫幌抵巖扃攀翠複而

三休步元梁而十憩廊軒外敞淑氣長延陰室中開鮮飈
自激俯環瀛而極望積蘚非遙出雲漢而高踐靈槎可託
真福地之殊觀香城之巨麗者乎寺主等沈研二諦振耀
二明抵蒼壁於邪山攬元珠於定水挹其流者曲成般若
之緣承其風者濬發菩提之願長史河東裴某風神朗潤
操履貞勤蕭條江海之心磊砢冰霜之節下岷關而叱馭
寄切全都臨蜀野而宣條功深半刺縣令衛元海內高流
河東望族榮高銅墨任屈絃歌浹辰而風化大行踰月而
姦豪屏氣陶潛彭澤自得高人王吉臨邛仍延重客縣丞

胡敬仁三河舊族一代良材提鎮鄆而願割跼驂騑而待
步江湖秋至方懷縱壑之圖海浪風高未接垂天之翼鄉
望等並中和受氣孝友承家才稱江漢之靈地實岷峨之
秀或以時良入選擢迹鄉鄰或以朝望來儀升名郡縣並
沐康衢之化俱承比屋之封瞻彼岸而同歸登春臺而共
樂咸以垣墉遽覆猶傳路寢之歌銀鼎俄窮尚勒靈臺之
頌无乎崇基奕奕與天地而爭工層構戕戕配山川而永
固豈可使宏規在我空存蔽日之基雄筆同時不借凌雲
之氣謹聞命矣乃作銘云

二象成紀三才定位開剖太虛導引元氣紛紛化迹颺颺
聖致行傑趣約歸同棄異法王西眷教迹東遊功超道茂
義冠儒流丹青旣備棟宇旋周梵宮霞積香閣星浮緬想
蓬瀛金臺迴起曠瞻崑閬瑤房峻峙壯矣名都神居攸止
大哉英服茲峯誕紀金繩對嶺玉牓分岑松扃委鬱桂幌
深沈雲龕樹晦烟洞花深重巒霧結複澗泉吟肅肅禪眾
遙遙淨鏡鹿野經文龍宮佛影梵臻金室光來石井峽曉
援清池曠鶴警岷峨舊族江漢英姿爭開法願重峻崇基
占雲接廡揆景分墀天人合應幽顯呈期靈思孤出神模

獨湧霧積千楹霞張萬拱玉牖星羅璿璫月擁複榭龍蟠
重甍鳳聳栽栽峻岳奕奕崇標琬簷切漢寶綴凌霄深窗
閨景洞户流飈銀缸夕映珠鐸晨搖我辭秦隴來遊巴蜀
勝地歸心名都憩足甫建鄉縣頻移灰燭聿從良時仍尋
妙躅曠望原陸周流江汜桃李春風芙蓉秋水烟霞四面
關山千里他鄉寓目茲焉復幾

廣州寶莊嚴寺舍利塔碑

昔者萬人疾疫神農鞭草而救之四維凋瘵夏禹刊木以
除之豈非物外其性則道功出事憊其和則任跡著傍稽

素篆仰叩元扉卽時義而規大覺因彝倫而佇真諦向使
三災克殄八正咸修人握戒珠家藏寶印則三十二相不
可得而視也八萬四千法不可得而聞也然則聖人以運
否而生神機以道喪而顯况迦維授手摩竭推心高張妙
用之功自拯橫流之弊蓋不獲已豈徒然哉故能業擁大
千化形真一由樂推而起七覺因來蘇而坐三昧發揮五
演以寂滅爲身常提挈四流用慈悲爲化迹黑風宵遁波
旬忿反噬之心綠沼晨開天常識問津之所括夷塗於九
相蹇步其安納慧晷於重昏迷方自曉大矣哉應物而起

興運而終至自於崑冥復歸於無物雖金沙宴駕雙林無
可作之期而玉牒遺文六塵有經行之俗象法不可以無
主微言不可以遂喪六千羅漢競結香緣五百仙人分開
講肆星龕月殿俄盈震旦之墟鳳剎蜺旌坐遍閻浮之域
屈伸闔闢其道矣哉夫寶莊嚴寺舍利塔者梁大同三年
內道場沙門曇俗法師所立也其琅邪貴族則漢庭峻節
祖德猶傳梁甫高吟嘉聲未遠法師夙登真地深入慧門
照果業於三明拂塵勞於八解羊車綺歲懸欣半月之詞
鳳閣觴年已振彌天之響道惟堅固行乃頭陀百結斯安

斥羅綃而不御十珍雖貴對藜藿而甘心於時以丕應天
人大宏繼侶法師至誠幽感獨步元宗豈直王公欽振錫
之風固亦天子降同輿之禮寶瓶宵注則雨露隨軒玉柄
朝搗則風霜滿席旣而素懷有在潛營擯俗之圖爰定我
居首托棲霞之寺爾乃巖開石雷邑跨金陵魚峯多讚唄
之懽虎溪有送迎之限紫蘿山徑居藏勝緣青松澗戶坐
諧幽致枕石漱流者久之原夫見化有緣應身欲謝昊天
罔極追懷自遠故有諸天會聚共位神光列國交兵

開三字

譯求其致豈不深哉然則麟鳳下靈猶稱瑞貺玉石微翫

尚騰精彩亦有楚鐸淪照擢紫霄以衡星周鼎沈華吐黃
雲而噴景誠浩作者之述足稱希代之貴况乎釋迦妙相
如來真骨雖八萬四千之寶塔散在羣方而九十二道之
靈虹終聞間出立誠斯應瞻庭廡而時逢非德不鄰厯山
川而罕致是以憂填頓顙思存電下之光波匿投身願奉
巖間之影粵在梁武精求不暇以爲秦登碣石而事止尋
仙漢索瀛洲而心非好善於是齋筵鳳設上祈忉利之宮
講帳星隨下請龍王之藏輕齋棹海重賞梯山庶玉匣之
全移幸金棺之半啟以法師智遺人我識洞幽明思假妙

因冀通靈感爰承綸綍載踐滄溟過石門而右指厯銅標
而左顧乘桴月泝戒楫星沼相彼遐陬實維荒裔一音演
說本承聽受之鄉五日繼明素隔照臨之域珍奇乃萃聖
德攸傳則知有感必臻信覃幽境不行而至豈隔殊方法
師旣達國城式敷朝命受銑筐而頂禮撫瑤緘而跪發盡
收其寶重載而歸亦猶珠匿弊衣須馬鳴而後用金藏陋
宇待龍樹而方開梁氏之都妙算而仰神光家之繇也

字疑有
脫誤

炎涼可質往返九十旬楫施不輟風潮八千里以

大同三歲屆於茲邑法師性豐幽澹質固虛羸綿厯是淹

疲疴屢積維摩見病益伸方便之門道安謝歸思遠朝廷
之事願居此剎有詔許焉仍分舍利俾宏真福國惟甌絡
郡實番禺爾其封疆跨躡之壯海陸會同之衝上當星紀
下裂坤維階百越而鄰三吳軹雕題而陬交趾神仙氣色
汀洲建不死之鄉舜禹精靈原隰現行宮之地閭閻霧撲
士女雲流謳歌有霸道之餘毗俗得華風之雜蜃樓高峙
猶埋夕帳螺臺峻積尚識朝基信夷夏之奧區而仙靈之
窟宅也此寺乃曩在宋朝早延題目法師聿提神足願啟
規模爰於殿前更須彌之塔因緣盛力人以予來徵日官

而正墨集風師而舉草育王奔命掃地戶而獻神兵梵事
馳心感天官而下靈匠崇階遽積寶樹俄周不殊仙造還
如湧出故其粉畫之妙丹青之要璿基岌其六峙凋關紛
其四照仙楹架雨若披雲翳之宮綵檻臨風似遏扶搖之
路散華璫於月徑璧合非遙撥罽網於星潏珠連可驗玉
虬承雷倬雲竇而將騫金爵提薨拂烟衢而待翥瑤窗繡
戶洞達交輝方井圓泉參差倒景雕鐫備勒飛禽走獸之
奇藻繪爭開複地重天之變懸梁九息良馬跋走而未窮
疊磴三休的盧騁健而知倦是栖銀櫺用府瓊函採舍衛

之遺模得浮圖之故事爰自梁末以迄皇初城邑屢新軒
墀若舊雖復百魔蜩沸聽鼓鐸而懷音六賊蜂屯仰椽欒
而革面多迴淨施罕犯仁官則知遐吹所會斯同偃草慈
雲所潤豈直流根故能比蜀守之祠堂長爲典制均魯王
之祕殿若有明徵宜其作鎮一隅俯炎荒而獨秀盤基有
地冠終古而長存者乎國家業擁太初事用皇極高祖以
援危撥亂伏紫氣以登三太宗以端拱繼明自黃離而用
九皇上纘乾坤之令業振文武之英風太階平而百度理
中國定而兆人樂時和歲阜邑頌塗歌以五刑不用六械

徒設舟車四達難論貢賦之差襟帶八荒非復華夷之隔
天寶降地符昇木石甄祉飛沈効慶雖叶和制變實賴文
思之功而持盈守成亦資連帥之助大中大夫使持節廣
韶等州都督李某早登清貫夙踐崇軒嘉猷迴發於天朝
善政果行於朞月越谿仙鶚吐光茫而駭人岱嶺寒松排
風颭以成性美哉稱由功著鵲響徹於雲霄方爲時須熊
軾疲於道路廣陵單轂如送張綱滄海亂繩復思龔遂王
尊阜蓋欣臨折坂之前吳隱朱軫更集貪泉之右高名夙
著佛化橫飛羣盜屏跡而歸農姦吏聞風而去職京坻坐

積圄犴潛迴汲黯之卧淮揚直聞清淨王堂之居汝郡但
舉賢良用能使檻穽不施猛獸巡江而遠竄市廛無擾商
旅倍道而相歡颶風寢毒炎埃罷厲人稱有道家實無爲
加以援翰寫心自契真廉之旨高談見意不踰元默之津
學究儒林真窮釋部知通人事且味禪宗道可以知歸物
繇其顯會是歲也忽於此塔重覩神光玉林照灼金山具
足倏來忽往類奔電之含雲吐燄流精若繁星之轉漢傾
都共仰溢郭周窺士女幾乎數里光景動乎七重實孟冬
之日也觀夫至道不私瑞生必由乎樂國慶基有會福至

必依於善人自非化足動微教非飾迹何以發真如之盛
契壯實相之輝華在昔鳳集潁川宣后歸功於良守龍游
湘浦章帝布德於賢臣厯選前猷茲爲故實然後上和下
睦主聖臣良滅火返風雖有辭於進壤母修子應亦何愧
於當仁至於百越衣纓三闕耆老或代傳篁竹氣推丹桂
之城家擅芝蘭名動蒼梧之野出平原而祛甲擁崇閨以
鳴鐘並爲蕃部之恩親覩招提之瑞同祈介福共潔齋壇
罄龍象於南州盡衣鉢於西竺會吞方仗供備孟蘭法鼓
振而沙界肅洪鐘鏘而鐵圍淨妙財爰捨法施爭流華轂

物於香城文駟填於寶廐錙藏巨億更入僧田價直百千
還登佛座豈徒照車十乘列隋氏之明珠盈筐萬金積大
顛之寶具而已朝散大夫守長史某地乘華緒價偃名流
豫章擢而成幹騏驥生而躡影山濤天骨無情吏隱之間
王衍風神自出塵埃之表自忝榮嶺海作式瀛幽略其小
術包其大體振溫良之逸步得毘贊之宏綱布道移風善
寵邦政歸休置驛獨守家聲然則野老行歌雖致功於露
冕藩君坐嘯固藉美於題輿化成異壤抑由同德故能道
揚法教揮斥蓋纏家懷方廣之恩人慕韋陀之學傳燈繼

曠曳組成陰下逮府寮旁周縣案並志薰修同希福慧時
有明威將軍行禺府折衝都尉李公天子之舊屬朝廷之
夙將也靈根自遠聖族多奇受睇盼於甘泉奉衣纓於平
樂青龍帶劍先超殿閣之榮白虎銜珠早陟齋壇之寵自
招皇誕作鎮邊城湟水樓船遂勞都尉灞陵車馬尚識將
軍魂驚斷雁之峯恩盡沈鳶之浦濡鱗涸轍處定水而彌
勤撫翼香林在窮途而更切頻光法會薦委殊珍護持攸
仰招提是屬其兆基也如此經綸黼藻其大矣哉爰有上
座寶輪等並妙根宿值勝果將圓翰飛般若之林高步檀

那之舍慈衿密洞散明月於談筵智鍔相輝化繁霜於寶
刃思琬琰璧式播徽猷弟子家嗣太邱忝閨門之薄宦地
連睢渙竊藻繪之餘工爰託下才用旌高躅豈知仲宣旅
泊方銜深井之悲長卿罷歸空負凌雲之氣我之懷矣乃
作銘曰

太息顏運嗟乎失道德弊爲仁物壯則老繫猿情暗求鴉
計早赤水沈珠元邱墜寶皇矣妙覺蒸然應期宗深微妙
業奧慈悲燃燈匡俗捨棧濟時涅槃不住般若無思俯迹
見生和光不減色音雖昧規模尚切猗歟上人穆彼惟新

智傾八藏心超六塵淒涼燬宅解脫迷津鴻冥佇想龍蟄
存身青蓋遺邦黃旗故服原隰形勢江山重複礪戶秋明
巖盤夜燭鼓鐘於宮聲聞於外聿求紫闥言尋丹瀨絕域
棲遑驚濤顛沛至誠冥感神珍顯會甄陶設險翼軫疏源
尉陀餘國盧循舊邊邑居雄盛人物殷全是維樂土實曰
龍川護持靈刹莊嚴寶塔基構鼎新亭樂檀業奔日宵排
歸雲曉納架壁三休連甍四合分惟星紀境控天池棟宇
繚邈衡津推移神機不應瑞景潛儀光合玉廡彩動金枝
凡我寮庶同嗟權實周顓情勤王濛思逸咫尺幽鍵往來

靈室共蔭法堂俱歸慧日四維信受三明宏益貝葉紛綸
龍華舄奕講肆宏敞齊筵巨翼供引純陀飯迴香積天人
合契幽顯同心傾家奉賄破產移琛軒裳賈鶩纓珮交臨
蘭薰習遠檀那意深偉哉連率冲乎德化職重隼裳秩遵
熊駕酌貪貽則還淳息詐道濟香城禎凝寶舍琳琅什種
杞梓緇徒調輕僧會辨析文殊奔螭易失令鼠難拘願刊
貞珉永冠康衢伊我窮途欣茲勝謁文休泛海仲翔遊越
倘想知音有懷明發謬惟雅顧叨陪天骨爰抽弱翰式敘
高蹤孤音易竭獨賞難逢思起王粲悲生蔡邕豈無章甫

誰適爲容

梓州慧義寺碑銘

并序

粵若三靈混極惟神藏妙物之機六氣潛周惟聖握財成
之柄考龜龍於百代覺路先迷徵象馬於三川元津晚闢
豈非君臣朴靜則上皇扶失道之危仁義沸騰則大雄拯
橫流之弊然後階四禪而縱觀再造淳風生三昧而端求
一匡澆俗詳窮祕躅迴測冥機觀俗化之浮沈考經綸之
去就則知理非徒寢勛華批天下之功教不虛行周孔雪
寰中之誚遂能往來真極表裏睿圖談慧日於昏衢廕慈

雲於燬宅由是妙音鴻漸化迹龍飛爲法棟樑作人父母
諸天競寫金仙滿目之容異事爭傳貝葉璿花之偈慧義
寺則安昌寺之遺基周使持節車騎大將軍儀同三司大
都督新州刺史安昌公之所建也公諱則字孝規後魏景
穆皇帝之元孫司空安昌王之元子雄才廣度身膺海岳
之靈華冕琬軒地積王侯之氣晚參周運位列虞賓爰撫
新州來光舊蜀江分石犀猶連赤岸之山路對金牛尚疑
青泥之磴榮高牧刺養隔晨昏披厚褥以驚心撫長筵而
下泣以爲臨川積慕尚疎鍾阜之巖康樂追懷竟鑿廬峯

之壁傍稽勝託俯植靈因窮廣漢之名山得長平之絕岫
憑危列戶亘險乘輿臨明月之宮塔對浮雲之徑青蓮
湛目下映香泉頰果含唇斜交寶樹重局寫翠攀疊磴而
烟周複樹迴丹委連岡而電屬眞童入衛山前桂樹之壇
神客來遊水上芙蓉之殿千楣鳳矯橫鳥道而斜飛萬拱
虬蟠俯虹莊而沓起霞明春牖卽對談雞露下秋亭仍傳
唳鶴松門不雜禪清避俗之心竹院長閑響合遊仙之梵
若夫招提淨域棟宇長存精舍祇洹規摹可襲亦猶林光
舊址遂起甘泉之宮露寢餘基因立靈光之殿自先后膺

歷今聖乘時堯曦將佛鏡俱懸軒車與法輪同轉眷香城而側席懷妙葉而旁施爰加慧義之名用徙安昌之號鐫鎔間起締飾爭飛前司馬蘇良父首引甄操前長史唐秀卿繼敦崇拓迺立彌勒下生像一鋪諸佛新變相一龕並對巘呈規分崖合勢容華秀絕相好端明盡雕刻之奇摹執丹青之有契隨峯寫狀旌旗舍衛之兵因石生姿花葉祇園之樹山靡進晚麗飾晨巖磻戶迎宵神光夜燭如來應化上辭兜率之天菩薩分身下入須彌之座時有就禪師者俗姓馮氏行遺生滅思出塵勞修定水之隄防擢禪

林之棟幹法忍以精求解脫俯會無生慧嚴以身證涅槃
坐觀真諦受蹤故事隔代同符形骨猶存英靈可視豈若
武擔山下惟傳智士之名蜀郡江前別畫文翁之像而已
哉又有慶法師者俗姓王氏貞機苦節以般若爲心謀輔
彌匡迷以菩提爲已任遂使邑南偃化爭傳廉恕之風濮
右馳情競起松篁之節爰有庾子山者文場之俊客也自
黃旗東掃青蓋西還承有晉之衣纓作大周之杞梓嘉聲
內振健筆傍流翠碣高懸丹書未缺瓊鐘俯徹猶參吐鳳
之音石鏡傍臨尚寫回鸞之跡朝請大夫長史河東裴爽

公侯映代貞白承家臨九折以長驅下雙流而作鏡清通
舊德王休徵之不虛領袖耆年龐士元之獲展縣令衛元
冰霜用足江漢情多傳衛玠之清談兼衛恒之博識牛刀
屈銳陵劍壁而裁風鳳軫鳴徽望琴臺而助化寺主大明
法師俗姓淳于氏蓋齊上客之遺苗漢廷尉之洪允避地
岷漢代爲豪酋法師住持真教棲息妙塗臨雁塔而虔誠
仰龍宮而繹思禪居遡蹟嚴君平之出塵梵肆延賓楊季
卿之好事上沐皇王之澤下承連宰之功收里巷之謳謠
覽江山之體勢咸以爲安昌故跡雖篆德於前聞新野殘

書未兼芳於後葉爰求勝律重勒奇蹤託勅以知己之賓
校勅以當仁之分文通景純之筆何後何先襄川峴嶺之
碑爲陵爲谷敢憑真眷俯竭虛懷披翰苑而長鳴下辭庭
而濶步揚子雲之繼馬人遠乎哉蔡伯喈之嗣張吾知之
矣敢作頌曰

三千淨土八萬名山銀臺海上金闕雲間禪居不雜覺路
長閑鸞鶴棲舉風烟往還蜀門南望岷波東瀉川路黃牛
關城白馬寶光僊鎮來清鉅野紫磴三危丹峯四下顯元
安昌俾侯江漢英威外發妙謀內斷慧則心機孝爲身幹

聿求勝蹟爰疏壯觀跨嶮垂甍緣崖構極玉座交映珍龕
間飭磴道魚鱗山形鳳翼露清軒冕霞明篆刻重巒架嶮
曲岫迴廊岩扉側啟澗戶斜張松門石塔竹院沙場齋庭
合梵講肆浮香鬱紆甍棟參差林沼葉障奔禽花岩度鳥
地遙心曠塵疎俗少鶴唳更秋猿吟漏曉法門幽寂禪宮
寥夔樹杳煙深泉飛虹映實爲妙域傍滋道性屢延銘表
頻流藻詠銅梁上德玉壘名師飾傳覺照顛闡文思千齡
道術萬古風期重規疊矩何代無之

梓州飛鳥縣白鶴寺碑

原夫玉都瓊室紫垣光大帝之庭金闕銀臺元壁壯羣仙
之域故能使神明有宅駕日月以長驅鸞鳳知歸撫雲霓
而上出斯則層集堦穴上皇迷棟宇之尊考室靈臺中古
識巖廊之貴然後冕旒前序提四海以爲家登步太階列
千門而有閔况乎耆山形見旁行草昧之先闕光宅乾坤
之右雖鶴臨西閤龍宮與正法同闕而象化東流雁塔與
遺儀繼起白鶴寺者蓋菩提寺之餘址梁武皇之所建也
香城福地之舊三巴五蜀之湊裂岷山之奧域分井絡之
榮光西包玉壘之墟北瞰銅陵之野南扃列第門庭萬家

東戶連峯岡巒千里實伽藍之勝迹得迦衛之英模憑絕
證以圖規俯長溪而作固自金陵不競玉鏡無章城池興
南路之悲亭障切北風之候崩山鬪水觸地網而三分墜
月奔星劃乾綱而五裂中原錯戾慈門爲虎豹之墟滄海
橫流定水穴鯨鯢之浦懷山旣蕩法服咸淪林院榛蕪軒
堂委寂遂使悲生棄井堙玉甃於三泉歎積爲山移瓊峯
於九仞皇上攝千秋之寶運緒三聖之宏機挾宇宙而先
神御雷風而首出靈功不宰華夷沾其貫之恩至道無私
霜露得平分之序考禎圖於日慎寤寐同符稽妙冊於年

刀幽明合貺然後東巡巨鎮追六聖而撫寰中南面太壇
朝萬方而小天下皇威旣暢寶應齊歸川岳薦靈風烟動
慶丹鳥抱日疑增帝閭之華素鶴低雲若赴仙庭之會昔
白魚黃竹業未峻於崇封赤雁芝房名不登於梵宇爰徵
瑞典肇錫嘉名重興般若之臺更起招提之院金繩夕布
絳秀嶺以開壇玉勝晨舒擁回峯而闢戶爰有宏演上人
者法門之秀士也行超常凍思越恒饑悲淨域之爲墟喜
皇波之普泛縱還舟於苦海驚浪旋夷叱歸馭於邪山靈
關非險於是淨財雲委眞猷烟馳如趨摩竭之宮似向毗

邪之國縣令梁宏悅首加甄緝縣丞梁敬一親昭施典上
憑天旨爭開舍利之壇俯會眾心競起須彌之座禺同故
嶺石鮮堅華廣漢餘垆地多疎斥事關經始人懷祗懼重
階不就空思太室之岷寶像無資未獲黎陽之土豈非冥
期肸蠁功參造化之外故能果唇間發蓮眸周映貝齒含
滋璿毫起照三十二相臨玉座以相輝八十四儀擁金山
而圓立層甍四合爍奔電於丹楹複殿三休絡浮烟於翠
幌因高積磴疑遷倒影之臺架險連榮似立迎風之觀琚
簷競注縈霧道以龍回繡桶爭飛縹雲衢而鳳矯寫歸禽

於寶鏡誤接朝鸞圖走獸於文璫疑栖夕兔雷霆蓄洩裁
臨承雷之間烟雨飛浮未出層巖之下輝丹青於菌壁妙
跡疑存炳銑塗於蓮龕神輝自燭鏘鏘櫺鐸聲傳桂葉之
風焰焰山爐氣結松陰之靄仰真容於始旦滿月晨昭窺
列棟於方宵長虹夜發香泉激溜有符溫淨之池珍木成
行無忝祇園之樹信煦尼之別府實兜率之殊庭者乎愛
友上座法師等情機藻瑩戒律圓明披玉笥以研芳候瓊
鐘而肅慮禪姿曉映依稀同雞岫之前梵唄晨臨髣髴像
魚山之曲縣令獨孤儉等或鵬垂待運終燮道於中台或

蠖屈求伸且毗風於下邑鄉望儀曹等或鹽泉錦室家稱
三蜀之豪或抱樸懷仁譽擁雙流之美或以爲山川肆踐
猶紀石於弇州陵谷生哀尚沈碑於峴首况乎德因時盛
慶流封拜之辰名爲功登事屬文明之運豈可使璿猷被
物終昧燮於元機金字韜華不題勲於翠旻敢作頌曰
睿塗菌藹靈機翕忽玉架天都金裁地闕法王利見香城
繼發雁塔齊雲龍宮瘞月長江近域廣漢遺居禪扃共往
梵宇全疎迹均梁後義切秦餘山川牢落榛莽邱墟有聖
聿興隍皇降撫因天因地爲雲爲雨日觀龍驤烟壇鶴舉

肇開嘉號重光淨土猗歟上士道場真政物觀成章子來
興詠土石呈彩人靈合慶寶座晨嚴金山夕映紫微分殿
青岑曜郭複袖縈樓攢峯跨閣月低璿鏡星連寶鐸彩鳳
將飛蟠虹未落森沈桂宇肅穆筠壇花明柳砌葉暗朱欄
溪留夏雪澗咽秋湍山虛梵冷谷靜鐘寒法眾爰依禪徒
戾止望風三蜀征塵千里頓首元墀歸心翠宸業超有色
功齊無始偉哉冥化妙矣能仁去來均迹前後俱身寂滅
爲樂般若爲因題芳翠珉敢詣靈津

欽定全唐文卷一百八十五目錄

王勃九

梓州通泉縣惠普寺碑

梓州郪縣靈瑞寺浮圖碑

梓州元武縣福會寺碑

彭州九隴縣龍懷寺碑

常州刺史平原郡開國公行狀

欽定全唐文卷一百八十五

王勃九

梓州通泉縣惠普寺碑

若夫元機默運披睿烈於三精素鍵潛融肇神功於萬彙
則有靈期肸鬻龜龍負河洛之圖帝緒氤氲賢哲舉乾坤
之策雖功懸日月終植軌於寰中業靜雲雷未逃規於象
外爾其譯雉林之寶偈詮鷲嶺之真圖抽紫玉於禪山朗
元珠於智水不生不滅光臨妙物之津無去無來璿發乘
時之契仗三明而獨運施洽平分據二諦而同歸功超邃

古故能使三千法界向風知衽席之師百億天王聞道失
巖廊之貴非釋迦之神化其孰能與於此乎旣而正法將
隱微言不嗣應身旣沒遺儀間起恒星夜掩西天銜風霧
之悲夢日宵成東漢肅壇場之禮由是鹿園層敞象教旁
流宣妙獎於希夷範靈蹤於顯晦瑤龕寶座光華震旦之
墟鳳刹蜺裳斧藻閭浮之域其寺蓋梁大同中年所建地
分彭蜀嶺對岷峨憑廣漢之遺墟藉犍爲之舊壤西馳峭
嶠山連白雉之郊東赴長川江走黃牛之峽崇墉却峙之
勢庭衢四會勝里九曲之分閭閻萬積危冠袷服參差軒

蓋之前露渚風畦隱軫亭皋之望是惟仙境實啓香城煥
若神明恍同化出紺壇烟屬疏絕閣而三休紫殿雲深徹
迴廊而四注重樂複棟霧緝霞張繡桷瑯楣驚伸鶴跂珍
臺控景羲和獲練轡之因綺榭裁氛屏翳得停鑣之所連
費積翠交玉瑣於星衢洞戶流丹綴金鋪於月竇垂珠網
露傍傾漢浦之琛列鐸吟飈上合鈎天之樂固以輪奐之
美冠真宰以先鳴雕範之奇告靈基而得雋乃造彌勒下
生像一座相好端足華姿朗備貞觀末年靈暉繼發房櫳
匝曜疑連不夜之城戶牖皆明似出重昏之境自非理參

幽贊道叶冥機宣佛鏡於無方演慈燈於已絕豈能寫丹
青於實相妙色長存圖銑鑒於真容神光不昧若乃時暄
福地低落照於晴暉候肅禪房汎初華於霽景千千寶樹
若在雙林一一妙香仍清八味山翬僊晚跂葉嶼而相鳴
野燕迎春拂花簾而自樂松楹秀蔓曲成蘿薜之衣砌石
生蓮直起芙蓉之座則有施身童子戾止巖扃忍辱仙人
來儀磴戶都人野彥希梵席而投裾趙美燕姝望齋庭而
繼履莫不青鳧委貫俱欣不捨之壇紫貝兼明共化無緣
之力故能使珎形畫塔象設年滋彩帙瑤箱龍編月久豈

西周之道備南國之風成者乎爰有寺主等覃機邑外練
迹塵間浴甘露於身田集祥風於性宇栖情不二忽起初
地之權援手大千猶擁彌天之具縣令等或公侯百代元
貂列駟之門或文史三冬吐鳳迴鸞之客銅章墨綬任切
臨人鐵印黃簪功宣漸陸局牛烹而待價肆夔屈以求伸
揮鋒九仞之隅作鏡雙流之外錄事柳元等丹軒紫紱家
傳方面之勲驥子魚文地列膏腴之右昔承隋運屢委天
書爰自皇初顓流帝禮等賓渝之奉漢類微濮之匡周咸
申白馬之盟並受飛龍之託故能遺風罔墜代濟其美望

重西南功宣法俗咸以爲絃歌小政猶篆德而垂芳鍾鼎
微榮尚銘勲而作鑒况乎神威自在方傳宰匠之功豈可
棟宇常存不勒山河之贊爰託幽鄙奉揚徽猷敢宣此義
而爲頌曰

天地定位君臣作極道在巖廊功霑寰域尚清皇盼猶歌
帝力况我能仁惟神不測誕生迦室利見王城機罩有應
業會無生長驅定境振旅魔營恩兼動植勢絕隨迎燕山
傾仞鶴林埋景慧日西沈慈波東馳競窺靈相爭參佛影
月殿分城雲龕動嶺長江舊域廣漢遺區川分潼峽塞接

岷渝閭閻四會亭障威紆爰開寶地實控名都霞牆百雉
雲甍四注紫闕尋烟頰樓結霧波流虹起雷奔躡步綢罩
星鶉璫栖月兔靈機藻緯禪室安閑琬金範玉舉翠浮丹
神宮不夜虛室長寒光超有色眈出無端清露花徑飛泉
業戶礪綠苔秋山蒼樹古茫茫庶類巍巍淨土鶯鷺同歸
華夷共聚第一義諦寥廓法門迹離生滅思舉乾坤情迷
則復道在爲尊惟名與器萬古長存

梓州郪縣靈瑞寺浮圖碑

辨夫神州括地寰中分五嶽之圖巨壑浮天海上擢三山

之秀造化之所樞紐靈仙之所窟宅故得昭灼天漢發揮
雲氣牛頭山者卽廣漢之名峯也圓裔幾乎數里直上逾
乎百仞若乃巖泉銑石之什風烟草木之狀傾九圍而得
雋環四時而競爽蒼岑隱嶙旁分玉砌之階碧洞逶迤下
掬金陵之苑實羣聖之所託也隋開皇中王秀作牧益州
來窺勝地首旌嘉號仍疏淨域因危裂戶就嶺磴之成規
跨險分榮借岡巒之迴勢工窮雕鏤妙出丹青飛棟神行
迴甍靈構又於山頂別建浮圖隋運告遷明皇首出軒疏
凋昧基趾堙蕪奄興宣榭之災施及柏梁之燼鄉望等馳

心妙律夙契禪居悲梵宇之摧梁痛珍臺之絕構思宏法
願重緝奇功黨集且千家惟巨萬以爲玉樓星峙稽閭苑
之全模金闕霞飛得瀛洲之故事指香城而聳睇臨火宅
而危魂參妙範於神明騁良工於宇宙飛廉按轡定樞臬
於風衢羲和頓策揆鉤繩於日路雕簷畫棋龍迴紫漢之
間複雷重轡鳳舉丹霄之外瓊扉暮敞推明月於金鋪繡
栊晨開落繁星於玉砌每至兩江春返四野晴初山川霽
而風景涼林甸清而雲霧絕沙汀送暖落花與新燕爭飛
城邑迎寒涼葉共初鴻競起則有都人襲賞憑紫楹而延

衿野客含情俯丹櫺而極睇窮百年之後樂寫千里之長
懷信可以澡雪神襟清疎視聽忘機境於紛擾置懷抱於
眞寂者矣且勃旅遊岷徼漂舉涪鄉年畧一窮時灰七變
王陽西上方驚歛轡之心王粲南征實動登樓之思我之
懷矣乃作頌曰

大塊甄實名山作紀登地龍盤干霄鳳峙風雪萬邑岡巒
千里絕域天成珍臺地起揆利元嶺圖基丹嶠層棟崢嶸
重簷竚窳有隋紊厯重明改照事與時遷迹從原燎義均
除舊事切爲新如或繼者代有其人聲飛隴蜀望動州鄰

爭開禪施競植靈因控險栽標循危列構巖烟接廡風雲
對雷鐸運星衢璫懸月竇紫軒霧合丹梁露透暮春疏節
新秋戒序照滿暄郊氣銷寒渚樹濃鶯亂川長雁舉流涕
寫懷魂馳意與偉哉靈宇壯矣全模窮高極麗遠覽長圖
賞因時合筆爲神驅有情君子誰爲捨乎

梓州元武縣福會寺碑

若夫考龍圖而括運撫麟筆以傷時天地閉而賢人隱周
孔逝而微言絕豈非太階無象三辰鮮道敘之因滄海爲
陵百川有橫流之勢况乎法身長往顧糟粕以空存化迹

繁流仰舟航而遂遠雖復功推八正猶迷鶴樹之談道亞
三明未覩龍宮之籍則有妙音難遇瞻雪嶺而投軀真諦
希聲仰雲山而破骨優曇企景新雕白玉之龕般若尋風
舊化黃金之像三千寶座迴出天宮八萬珍臺遙臨淨域
非慧圖之冥感孰能臻於茲乎福慧寺者隋開皇中之所
建也爾其峯巒霧列東分井絡之光樓雉雲橫西覩禺同
之奧北彌豐邑里閑千甍南控平江波潮萬里擁亭皋之
絕勢昇林野之殊形肇開修竹之園式揆旃壇之剎法川
高開慈宮峻敞文璫寶綴環日月於重廊翠棋丹楹起虹

蜺於複殿眞容俯映福眾爰依梵筵交燭禪房互啟山神
獻果還棲承露之臺天女持香卽遶飛花之閣輪輝夜滿
抽紫焰於金山毫相晨臨發珠華於玉地爰有縣令柳邊
河東令族大業之年來光上邑高人捧檄功爲銅墨之先
令宰鳴琴課稱絃歌之最眷香城而惻念披道肆而驚魂
示懷延獎思宏末教迺於寺內起重閣一所乘煙置臬揆
日端繩層榭三休凋簷四注奔星掛廡混珠網而同歸明
月窺軒雜璿璫而其貫仍抽麗筆俯刊貞爰詞源迅委振
法海之波瀾義宇宏深接禪宮之閭奧昔者陶潛彭澤罔

聞仁慈之風潘岳河陽未入菩提之域兼其美者蓋在我
柳君乎俄而帝隋方否三官失龍鳳之圖皇業未昌九野
被豺狼之毒雖復餐砂茹石窺劍道而迴心蜂聚梟騰指
銅梁而革面自非法雲西睽潛消火宅之氛慧日東來迴
朗昏衢之景則安能冥資福地顯阻魔軍波清於振壑之
隅燎息於爰崑之曲洎乎大鈞無事神器有歸清玉戶而
帝衷中轉金輪而王天下元場佛境與天下而惟新鶯樹
雞林共風雲而改旦功旣成矣時旣貞矣紫宸有裕蒼朮
胥悅都人狎至瞻雁塔而懽心野老相趨尋鹿園而頓顙

或至誠冥發爭知不盡之虛或道思旁流竟委忘緣之施
乃於寺內造菩提塑像一座實彭氏絕羣之迹洞參瑤銑
體備丹青得埏範之奇模盡陶甄之能事功分實相變入
冥機丹果長春青蓮不染靈儀若動似臨王舍城中神足
疑行卽坐菩提樹下銀牀地湧寶帳猶懸珍木天成金花
不落總章元年又奉爲皇帝更造八菩薩像成於淨境別
峻崇堂而力寄羣緣功難獨舉遂令眾情馳騫空懷更始
之圖靈座端嚴未得安居之地時有宏演上人自丹鳥下
日昌帝錄於明堂青鶴乘霄降仙苗於太室軒冕將風雲

欽定全唐文

卷一百八十五

王勃

八

交映鐘鼎與山河共遠法師夙成真諦幼挺殊姿拔五翳
於長驅登四禪於迴觀以爲德因時建澄什繼踵於西都
道翼人宏林遠隨肩於南國痛迷生之詭矯悲正覺之陵
夷思欲樹真氣於未萌緒崇因於已往遍遊淨境厯騁遐
方至總章二年憩於茲剎身持寶印口出神珠心動巴南
化行蜀右法羅潛舉馴鳥性於慈林慧鏡旁開息猿心於
定水亦有情鉤五縛遙騰解脫之川想塵六塵迴拔沈迷
之域名臣長者捐玉珮於銀庭善女靈姬落金環於寶地
貪機霧滌法施泉流林衡掄杞梓之材班匠獻鉤繩之巧

千櫨電糾萬桷霞張飛陸緣甍層構架景瓊缸沓照乘紺
壁而宵分珠箔重華掩青疏而曉亂紅葩植井彩綴河宮
丹桂承梁香交列肆天倡梵樂肅然忉利之天藻蓋瑤璫
煥若摩伽之殿其精力之元感而神化之曲成乎直歲寺
主等州閭盛族鶯鶯榮因昇慧圃而功成踐魔庭而戰勝
排四門而獨往共極羣緣攀十地而遐征同趨覺路縣令
虞洽旌旗百代劍履三朝匡帝座而南征擁台庭而北面
星象垂社川岳載靈豫章七歲麒麟千里雄情負俗鬱王
佐之宏圖英識邁時得公門之逸氣旣而拂衣華族入天

邑而觀光列板仙臺出靈關而作宰泉魚狎夜多單父之
深恩隴翟遊春嗣中牟之善政有條不紊施緩政於繁繩
斷訟有神下高鋒於錯節因以激揚大化潛滋比屋之封
光啟令圖預積攀輪之慕縣丞裴休家接朱欄譽流丹闕
軒裳照緒忠孝榮門鳥鳴有伐木之歌龍文非刈蓬之具
高材列務盛德分司翰墨不足留神琴樽申其獨性十旬
休沐奄有泉林千里邀迎乃疲風月青驪蹀躞終噴玉而
懸雲素鶴徘徊且銜珠而犯露加以沈研有地題橋八解
之津誘勸無方叱馭三乘之路故能使幽明仰德法俗依

仁攀海祇而如歸挹衡罇而下瞰鄉望等龜靈高族驥子
名家關錦室於中堂分綺疏於甲第或望雄都鄙代列歌
鐘或業預雲雷門藏璽詔文場促席有江漢之英靈武觀
連衡得岷峨之銳氣並能馳心彼岸欲臨海而蹇裳投足
化城下悲思而反袂下官薄遊江右旅寄城隅懷道術於
百齡接風期於四海依然梵宇欣象教之將行莞爾公庭
惜牛刀之遂屈雖文殊辨論妙懸解而忘言而伯喈雄管
敘真宗而同愧敢巡此義乃作頌云

金堤迴色玉峽長瀾城闕紛亂江山聳盤雲屯勝邑霧啟

禪壇右紫層雉左接崇巒竹園精舍檀山香閣萬棋騰虬
千楣跂鶴晚星疎翠朝霞泛腹鼓奏泉流鐘鳴霜落時經
失道代厯交呈神宮不撓法眾無驚金輪邃曉玉鏡施明
功照佛刹化被王城帝圖冥運真儀濬發貝齒含星流毫
耀月鳥離山扃龍還海闕寶樹形留天宮匠設爰有真人
式宣慈主發迹江甸馳聲蜀宇望遠連規攀澄襲矩力窮
興道功周廊廡羣緣肸蠁眾福氤氲叢楹列電高棟銜雲
銀龕曙撫玉座宵分瓊瑣有爛藻繪多文鬱彼巖邑猗歟
上宰松桂連華鴛鸞集彩禪津有裕至公無待火宅可辭

舟航斯在我之飄寓邈矣來遊山川俯仰道義淹留承風
郭外撰綴江幽元機勝筆天地相周

彭州九隴縣龍懷寺碑

粵若真元混沌抱一氣於天門象化童蒙構三靈於地戶
由是金城逆順山河假成器之因玉燭沈浮風火兆流形
之蘖懸大明於日月適滯泉宮設巨浸於雲雷終迷燉宅
太極所以散而爲兩洪飈所以吹而爲萬雖復卑高異列
俱沈方內之遊空集橫流共失環中之契豈夫涅槃深視
不背色以求真般若長驅每乘空而得靜則知一名同出

陰陽爲破道之墟萬象皆空天地卽降魔之境莫見其俯仰不知其去就至自於太虛復歸於無物其建言立德開業成務握大柄而推造化執洪鑪而詰元始西門幽闢顧非相而遲迴三駕晨嚴臨有爲而出頓豈不知羈孤長路終嬰旅泊之虞舟楫中流未釋風濤之苦將以宅心者寂虛室所以合符應物者神明鏡由其不倦故能商榷宇宙指麾權實演羣生而非其力存庶品而非其有千巒閉景似居蓬艾之間雙闕臨空若在江湖之上其釋迦之沖用乎龍懷山者井絡之所交會岷隅之所控帶攢峯北走吐

沓嶂於元霄巨壑南馳歎洪濤於赤岸香城寶地左右林
泉碧岫丹岑往來煙雨時有法會禪師者俗姓褚氏吳郡
錢塘人也金章錫美河陰傳九命之尊玉鉉乘榮江左受
三台之貴地靈人傑自朔野而重光學府文宗冠南都而
獨秀法師紫星降彩紅雲受氣應積善於高門契冥緣於
累世果浮觴引潛圖彼岸之功聚礫延砂卽揆爲山之業
靈樞密運開仁路而長鳴慧刃高揮斬邪關而洞照以爲
冥機體化毫髮莫滯其真執數逐微乾坤不容其算於是
四禪幽觀破銅堞而出無明三昧雄圖排鐵圍而泯非相

法雲自在吐納龍宮賢聖不仁奔馳象域將使三千塔廟
知真實之元津萬億幡幢入空虛之祕藏安心樂土遁影
靈闌以開皇元年憩於茲嶺靈墟福地已被神功玉勝金
繩未光朝命蜀王秀以文昭建國帝子專征仗巴服之尊
名裂邛荒之寶命彤駢僭帝蹕萬騎於銅梁阜蓋圖王警
千乘於玉宇鏡山南望志狹彭渝錦水西浮恥朝江漢開
實沈之壁壘嘯京叔之風塵擁龜堞而託殊方憑爵堂而
傲天子威權所制勝兵數十州雄視所臨經塗五千里三
英賦雪瞻秋月於梁臺八叟吟風傳朝雲於楚館思宏正

法廣召名僧振錫雲趨乘杯霧合禪師括囊泉石韜跡煙霞攀紫桂而同塵守青蓮而向晦衝飈蕩岳寧移忍地之靈烈火焚山不撓堅林之色王心有悟時加優禮順風拜道封山謝失發淨財於廣內揆仙室於重幽因嶂爲壁憑崖列戶以開皇五年始賜額爲龍懷寺地鄰縣左遂均縣上之恩山似龍盤卽建龍懷之刹爾其崇巒經復復礧縈迴高邱洩雲長林翳日增瓊垣於下麓揆瑤構於中巖香闕神行珍臺妙立玉虬銜靄絕游氣而負蒼天金鳳連甍排烈風而瞰元圃延綠房於疊巘上拂霞莊蔓丹闕於重

磻下披泉戶陽開陰闔變霜露於旋迴蠖動螟飛起雷霆
於指顧玉堂朝亘影襲長虹珠殿宵浮光含列宿禪師歿
後爰有孝恭法師智開法師宏嚮法師寶積闍黎四上人
者並禪師之上足而法門之領袖也五明衢路控引情宮
八解源流朝宗性海其深爲寶拔白玉於嶰巖無礙居真
得元珠於象罔住持真界栖息妙塗俱深寂滅之源各證
菩提之域雖業定人境照已極於無方而道寄生成功遂
覃於有相演中乘之奧義增上棟之宏規萬拱不騫千門
有闔俄而帝隋大去皇家小往天地閉而賢人隱雲雷屯

而巨寶衰毒龍橫霧四天沈暗逆之悲醉象驅風三界溺
崩離之酷上人慧機幽晤定識潛融知佛日之恒明審王
風之尚靜芝歌商岳揆雞嶺而同歸茅藉磻溪與猴江而
共致遁俗無悶因時有待泊丹陵啟秩赤縣居尊迦維授
手波旬革面十千天子新朝帝釋之宮八萬仙人始向毗
耶之國一音演而荒景服三聖澄而禮樂備由是巴方舊
彥蜀城遺老仰慈門而知戶牖升福田而喜耕鑿雕鞍繡
轄瞻燕岑而馳魂黼帶綖裾指鸚林而驚款寶瓶宵注潤
浹堯甸玉塵晨麾風調舜厯咸以爲假沈其性迷生安視

聽之功動亂其心窮子失肌膚之戀江連巫峽始絆心猿
山對禹同終維意馬貞觀年中積闇黎等迺宣昭遺址發
揮精舍容成校厯揆日用於天經隸首陳章算神功於地
籙迴廊窈窕自吐風颺列樹崢嶸坐含雲雨圖竭官之妙
質儼盧舍之真容寶珠周映銀龕備色逸多垂足似臨兜
率之天師利分身若赴維摩之境靈仙可接藻繪無施真
應難徵雕鐫有寄若乃巡積岨厯森沈天花照而高月落
地籟驚而幽泉湧紫蘭花徑香侵柏葉之鑪綠草文茵影
入芙蓉之座真童鳳策卽踐金沙仙女鸞衣還窺石鏡巖

莊轉梵杳冥松桂之墟磻戶栖樵寂寞藤蘿之院法鼓奏
而寒山曠洪鐘鳴而曉壑靜頽苔翠蘚具不盡之靈衣石
乳瓊漿入無生之妙饌肅肅焉遙遙焉信調御之珠庭而
列真之甲第也爰有上座元鑒法師等並六塵無我四諦
非他奉乾越之微言守楞伽之奧府法雷潛吼鼓動風煙
慧日揚明照臨邱壑青溪坐定見心宅之恒靈丹洞行忘
覺身城之每化須彌不動迴鎮閻浮闍崛安居下觀忉利
開四生之廣路敘六趣之彝倫足以導揚真績恭宣來命
者矣縣令柳公諱明獻字太初河東人也太元降氣中黃

授彩襲周魯之榮基吐河汾之靈液四科高第振風翮於
三冬萬室崇班跼雲驂於百里旣而政成黎頌道洽畛謳
假無上之幽筌毗不言之景化絃歌在韻將寶偈而齊歸
銅墨成章與梵天而共貫瓊波湛淡沃蕩雲雷珠灌蕭條
蔽虧烟雨貞機罕應良談放好事之遊朗調多奇高賞盡
名山之曲下走東臯事失南州塗窮歎孔席之栖遑笑陽
歧之浩蕩薄遊茲邑喜見高人三接而定琴罇七縱而擒
風月林宗有道相期清濁之間平叔能言見許天人之際
從容宴語契濶胸懷欣性情之同冥感形骸之共遣雖元

都妙域已挂於忘言而義塾文場竊申於知己敢作頌曰
妙象無倪神功有涉湛淡名器奔騰事業慧路翹車禪河
艤檝控引羣品輪迴庶劫縱橫宇宙反覆山川言因境立
道寄形詮爰稽福地式揆珍田丹溪漏日碧洞栖煙闍都
玉檻須彌石室榛灌溟濛風雲蕭瑟睟容迺眷禪徒有謚
業磴三休花巖四密崇巒架殿疊嶂營樓千楣鳳起萬拱
鸞浮星開紺髮月湛青眸神宮不夜邃閣長秋戶臨重甍
窗分絕嶺半漢香浮中天梵警鶴林聖迹龍泉佛影鳥思
山空猿悲峽靜森森巨柏落落實長松月出東岫霞生北峯

山人自狎野老相逢白雲屢斷青溪幾重彭澤之令臨邛之客比德山藪重規泉石法宇成言慈門致役糠粃吏隱薜蘿心迹吾生擾擾與道遑遑殷勤頌詠惆悵津梁投功翠碣助化元場百年之後苔蘚蒼蒼

常州刺史平原郡開國公行狀

某州縣洪飈未翔靈鳳垂翼景雲不燭神龍宛頸豈非時不可以苟遇道不可以虛行聖人作而萬物覩神功資而百寶用是非山川倒徙太階懷息亂之臣天地乖離元首佇康時之具則有得其數者於平原公見之矣自星虹沓

泃開寶錄於軒圖雷電窈冥載休徵於魯識龍驤鳳起霸
圖存玉壘之雲紫蓋黃旗王迹著金陵之野故得卿才表
秀疊彩駢蹤卑蓋朱幡連州比郡公侯必復子孫承百代
之基餘慶不忘仁義應千齡之運公鼎門疏照穴岫翔輝
分嶽秀於樊侯稟辰精於傳說折旋儒館以六藝爲笙簧
軒翥翰林用兩京爲鼓吹經邦化俗涉游夏之門庭減竈
麾兵得孫吳之閫奧皇天眷命聖武膺圖覩物懷人思功
去罪寰中有事曹參希執帛之榮閭外多虞周緹金中軍
之寵見危授命藏器及時攀鳳羽於九霄候龍顏於千里

蕭王內寢頻獻雅誠韓信齋壇屢遷優秩武德三年授中
郎將俄遷大將軍秦王統軍皇基肇闢天步猶難宸扆應
上相之榮仙夢受中權之寄被廬講將實賴宏圖今日僉
謀先應時望於是弄兵竊舉猶勤甲冑吞沙餌石尚阻河
梁公制變以奇盪除以殺七擒三捷之略緒著轅門拔旗
穿札之能勲在盟府五年六月加上柱國隨班列也翦桐
疏爵分茅建社下斷物土上格星躔唐虞著其升降周漢
明其損益所以羽儀帝室蕃衛王畿懲惡勸善庸賢敘德
高祖勲逾黜夏業擅戡黎置酒醴於南宮揚旌旆於東府

建皇帝之號安不忘危覽徹侯之籍榮而思報以公乃誠
匪懈原始要終望嚴雪而識寒松觀疾風而知勁草九年
封望都縣男貞觀元年改封縣侯文貌禁旅實著趨雄清
道放行允茲多士自非譽高朝諷價重人謠仍窺博望之
儀必亂鉤陳之選公早陪戎律夙簡帝心敷歷二宮當仁
不讓授左衛中郎俄遷右虞侯率蔥山狄壤蒲海蠻貊信
要服之外區乃匈奴之右地境鄰蛇澤乘勁敵而鷗騰郡
邇酒泉候宵塵而鶚視天子乃停旒側聽負宸晨驚振洪
策於古今溢嚴勲於覆載將使八紘昭泰銀臺應益地之

欽定全唐文

卷一百八十五

王勃

六

圖九縣平夷瑤水流尋仙之駕貞觀某年授高昌道行營
總管公道凝三略功標五才逸氣縱橫雄精貫月象物而
動鼓聲肅戰士之容推信而行歌舞表將軍之德裏糧坐
甲輕死等於鴻毛投袂衝冠重義均於熊掌鑒空歸惠荒
度來賓收鄭吉之前蹤復張騫之故事廟堂頌德魏闕疇
庸光贊六條非公莫可某年授某州刺史尋以江淹奧域
衡霍名區楚情剽狡吳風澆競火耕水耨郡闕嫠女之精
竦劍危冠人尋鱗諸之弊分宣演化卧理切於宸襟易俗
遷訛行吟佇於人望貞觀某年遷睦州刺史政刑不隱考

績連最俄授使持節松州都督今上鈞臺嗣歷鼎邑凝圖
百城勞晉武之心千里揚漢宣之詔璽書加秩禮縉諸藩
綸煥層班事高恒典永徽中改沙州刺史屬鼇山亂德鴻
水稽誅扶桑落日之濱妖朋蟻結孤竹尋雲之際孽黨蜂
騰百濟遺黎託懸巢而斬氣三韓別種附危幕而遊魂玉
帳蒐兵佇責苞茅之貢金壇令律將收楛矢之琛龍朔年
中授公熊津道總管公昔從幕府早廁戎行覽兵法於軒
轅受陰陽於呂望三門五壘得破敵之奇謀火艦雲梯總
行軍之妙法故得戰無全陣野靡堅城撻金將躍馬暫臨

銜璧與牽羊相繼豈惟秋方亂遙聞定遠之名春谷投
心遐想度遼之策若斯而已矣及三軍獻捷諸將論功帝
嘉乃勲作鎮爰野授公廣州都督改封平原公以遼鄰北
戶地接南池珠崖魑魅之鄉銅柱貪殘之境累藩斯寄歷
任稱難於是受以春風臨以夏日明冠婚於縣邑布庠塾
於閭閻薤本誅強姦豪屏氣棠陰察獄惇獨申哀理龔遂
之亂繩解虞卿之錯節黃霸得循良之譽績未銜於邊城
陳湯有方面之勲位不登於刺舉兼方具美其式茲乎朝
廷以公屢參伯牧駿歷班條更不忍欺人無胥怨伏情馭

極留連稷野之童託義訓昆惆悵耶溪之老雖有黃槐紫
棘無以易堯盛嶽名都猶聞借寇麟德元年改授金紫光
祿大夫常州刺史旣而天機忽爽大漸彌留白玉徒煎黃
金難化台階側席方膺雉冕之尊玉女停機俄逢鵲衣之
變以某年某月日春秋若干薨於公舍嗚呼哀哉惟公間
氣呈姿靈和叶慶鳳鳴千仞鵬搏萬里情關峻遠得意於
眾妙之門性宇沈凝忘筌於毀譽之境因心以至孝悌表
於鄉閭臨義而行祿賜均於宗族故得虬驟螭屈服冕乘
軒歸漢於締構之辰遊梁於駭亂之際章溝霧開曳鵲尾

而晨趨甲館煙開奉旄頭而夜警鳴聲出塞進李牧之奇
誠露冕巡方受蘇章之直筆方當獻納黃屋揖拜青墀入
東寺而掌壺處南臺而曳履不謂藏舟夜涉負杖朝興丹
邱之化未尋元扃之痛俄及故怨深撤樂悲躔罷市者乎
謹狀